



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍՆԱՆԿՈՒԹՅԱՆ ԴԱՏԱՐԱՆ
Ո Ր Ո Շ ՈՒ Մ**

Պահանջների վերջնական ցուցակը հաստատելու մասին

«19» ապրիլի 2023թ.

ք. Երևան

ՀՀ սնանկության դատարանի դատավոր Լ. Կատվայանս, քննության առնելով սնանկության գործով ըստ դիմումի ՀՀ ՊԵԿ-ի՝ «ԼԵՈ 666» ՍՊԸ-ին (ՀՀ, ք. Երևան, Լեոյի փ. 72, պետական գրանցման համար՝ 286.110.1196225, պետական գրանցման ամսաթիվ՝ 17.09.2021թ., ՀՎՀՀ՝ 02846724) սնանկ ճանաչելու պահանջի մասին, պարտապանի նկատմամբ ներկայացված պահանջների վերջնական ցուցակը հաստատելու հարցը՝

Պ Ա Ր Զ Ե Ց Ի

ՀՀ ՊԵԿ-ը 2022թ. մայիսի 19-ին դիմում է ներկայացրել ՀՀ սնանկության դատարան՝ «ԼԵՈ 666» ՍՊԸ-ին սնանկ ճանաչելու պահանջով:

Դիմումի հիման վրա կազմվել է թիվ ՍՆԴ/1459/04/22 սնանկության գործը, որը 19.05.2022 թվականին մակագրվել է դատավոր Լ. Կատվայանիս:

Դիմումը դատավորի աշխատակազմին հանձնվել է 20.05.2022 թվականին:

ՀՀ սնանկության դատարանը 20.05.2022 թվականի դրությամբ դիմումն ընդունվել է վարույթ:

Միաժամանակ ՀՀ Արդարադատության նախարարություն է ուղարկվել ժամանակավոր կառավարչի թեկնածություն ներկայացնելու վերաբերյալ պահանջագիր՝ սահմանված կարգով «ԼԵՈ 666» ՍՊԸ-ի սնանկության գործով ժամանակավոր կառավարչի թեկնածությունը դատարան ներկայացնելու նպատակով:

ՀՀ սնանկության դատարանի 06.06.2022թ. որոշմամբ սնանկության գործով ժամանակավոր կառավարիչ է նշանակվել Արմեն Խաչատրյանը:

«ԼԵՈ 666» ՍՊԸ-ին և վերջինիս տնօրենին ուղարկված փաստաթղթերը ետ են վերադարձվել ՀՀ սնանկության դատարան:

Ուսումնասիրելով գործի նյութերը՝ դատարանը գտել է, որ «ԼԵՈ 666» ՍՊԸ-ի, նրա գույքի, ինչպես նաև հաշվապահական և այլ փաստաթղթերի նկատմամբ պետք է հայտարարել հետախուզում:

ՀՀ սնանկության դատարանի 18.08.2022թ. որոշմամբ «ԼԵՈ 666» ՍՊԸ-ի, նրա գույքի, ինչպես նաև հաշվապահական և այլ փաստաթղթերի նկատմամբ հայտարարվել է հետախուզում:

13.12.2022թ. ՀՀ սնանկության դատարան է մուտքագրվել սնանկության գործով կառավարիչ Արմեն Խաչատրյանի միջնորդությունը՝ սնանկության գործի վարույթը պարզեցված ընթացակարգով շարունակելու մասին:

Միջնորդությանը կից ներկայացվել է ՀՀ ՀԿԱԾ Կենտրոն, Նորք-Մարաշ և Էրեբունի-Նուբարաշեն վարչական շրջանների բաժնի որոշումը՝ կատարողական վարույթն ավարտելու մասին:

ՀՀ ՀԿԱԾ Կենտրոն, Նորք-Մարաշ և Էրեբունի-Նուբարաշեն վարչական շրջանների բաժնի հարկադիր կատարող արդարադատության լեյտենանտ Աննա Գրիգորյանը 10.11.2022թ. կայացրել է որոշում՝ կատարողական վարույթն ավարտելու մասին:

Նշված որոշման համաձայն՝ հայտարարվել է հետախուզում «ԼԵՈ 666» ՍՊԸ-ի, նրա գույքի, ինչպես նաև հաշվապահական և այլ փաստաթղթերի նկատմամբ: Կատարողական գործողությունների ընթացքում հետախուզում է հայտարարվել «ԼԵՈ 666» ՍՊԸ-ի տնօրեն Արմեն Միքայելյանի գտնվելու վայրը և նրա նկատմամբ հայտարարվել է հետախուզում: Միաժամանակ պարտապանին պատկանող գույք, ինչպես նաև հաշվապահական և այլ փաստաթղթեր չեն հայտնաբերվել:

Ոստումնասիրելով գործի նյութերը, նկատի ունենալով, որ «ԼԵՈ 666» ՍՊԸ-ի թիվ ՍՆԴ/1459/04/22 սնանկության գործով հայտարարված հետախուզումը ՀՀ ՀԿԱԾ Կենտրոն, Նորք-Մարաշ և Էրեբունի-Նուբարաշեն վարչական շրջանների բաժնի հարկադիր կատարող արդարադատության լեյտենանտ Աննա Գրիգորյանի թիվ 09464590 որոշմամբ ավարտվել է, դատարանը գտել է, որ «Սնանկության մասին» ՀՀ օրենքի 103-րդ հոդվածի համաձայն սնանկության գործընթացը պետք է շարունակել պարզեցված ընթացակարգով:

ՀՀ սնանկության դատարանի 14.12.2022 թվականի որոշմամբ թիվ ՍՆԴ/1459/04/22 սնանկության գործը շարունակվել է պարզեցված ընթացակարգով:

Պարտապանին հասցեագրված դատավարական փաստաթղթերը կրկին ետ են վերադարձվել դատարան:

ՀՀ սնանկության դատարանի 23.01.2023 թվականի վճռով պարտապանը ճանաչվել է սնանկ:

ՀՀ սնանկության դատարանի 01.02.2023թ. որոշմամբ սնանկության գործով կառավարիչ է նշանակվել Արմեն Խաչատրյանը:

«ԼԵՈ 666» ՍՊԸ-ին սնանկ ճանաչելու մասին հայտարարությունը հրապարակվել է <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում:

«Սնանկության մասին» ՀՀ օրենքի 46-րդ հոդվածի 4-րդ մասի իրավակարգավորումներին համապատասխան, Դատարանը, պահանջի գրանցումից ոչ ուշ, քան մեկ օրվա ընթացքում վերոթվարկյալ պահանջների և նրան կից փաստաթղթերի օրինակներն ուղարկել է սնանկության գործով կառավարչին՝ դրա մեկ օրինակը պարտապանին հանձնելու համար:

Սույն սնանկության գործով կառավարիչ Արմեն Խաչատրյանը 03.04.2023 թվականին դատարան է ներկայացրել թիվ ՍՆԴ/1459/04/22 սնանկության գործով «ԼԵՈ 666» ՍՊԸ-ի պարտատերերի պահանջների նախնական ցուցակը:

Ոստումնասիրելով կառավարիչ Արմեն Խաչատրյանի դատարան ներկայացրած պահանջների նախնական ցուցակը, պարտապանին և պարտատիրոջը պահանջների նախնական ցուցակի մասին ծանուցումները, ինչպես նաև <http://www.azdarar.am> կայքում 30.03.2023 թվականին տրված հայտարարությունը՝ Դատարանը գալիս է հետևյալ եզրահանգմանը.

«Սնանկության մասին» ՀՀ օրենքի 46-րդ հոդվածի վեցերորդ մասի համաձայն՝ Պահանջների ներկայացման համար սահմանված ժամկետից հետո՝ եռօրյա ժամկետում, պահանջների նախնական ցուցակը կառավարիչը ներկայացնում է դատարան, պարտապանին, առավել մեծ պահանջներ ունեցող 5 պարտատերերին և հրապարակում է իրավաբանական անձանց պետական գրանցման մասին տվյալներ հրապարակող մամուլում: Եթե հրապարակումից հետո՝ յոթ օրվա ընթացքում, կառավարիչը, պարտապանը և պարտատերերը նախնական ցուցակի դեմ գրավոր առարկություններ

չեն ներկայացնում դատարան, ապա դատավորը եռօրյա ժամկետում առանց նիստ հրավիրելու որոշում է կայացնում պահանջների ցուցակը հաստատելու մասին (վերջնական ցուցակ):

ՀՀ Վճռաբեկ դատարանը իր կայացրած նախադեպային որոշումներում բազմիցս հայտնել է այն դիրքորոշումը, որ սնանկության վարույթում կառավարչի կողմից պահանջների նախնական ցուցակը պարտապանին ուղարկելը չպետք է կրի ձևական բնույթ: Մասնավորապես՝ կառավարիչը պահանջների նախնական ցուցակը պարտապանին ուղարկելու և այն իրավաբանական անձանց պետական գրանցման մասին տվյալներ հրապարակող մամուլում հրապարակելու իր իրավունքը պետք է իրականացնի այնպես, որպեսզի ապահովվի «Սնանկության մասին» ՀՀ օրենքի 46-րդ հոդվածի հիմքով հրապարակումից հետո՝ 7 օրվա ընթացքում, նախնական ցուցակի դեմ առարկություններ ներկայացնելու պարտապանի իրավունքը:

Վերոգրյալի հաշվառմամբ ՀՀ վճռաբեկ դատարանը գտնում է, որ դատարանները յուրաքանչյուր դեպքում պարտատերի նախնական ցուցակը հաստատելու հարցը քննելիս և այդ ցուցակի դեմ պարտապանի կողմից առարկությունները սահմանված ժամկետում ներկայացված լինելու կամ չլինելու հարցը պարզելիս պետք է հաշվի առնեն հետևյալ հանգամանքները՝

ա) ե՞րբ է պարտապանը ստացել կառավարչի կողմից ուղարկված նախնական ցուցակը և ե՞րբ է նախնական ցուցակը կառավարչի կողմից հրապարակվել մամուլում,

բ) արդյո՞ք այդ պայմաններում հնարավոր է եղել պարտապանի՝ սահմանված ժամկետում առարկություններ ներկայացնելու իրավունքի իրացումը: /տե՛ս, թիվ **ԿԴ-0033/04/13** քաղաքացիական գործով ՀՀ վճռաբեկ դատարանի 30.04.2015 թվականի որոշում/:

Տվյալ դեպքում «ԼԵՈ 666» ՍՊԸ-ի սնանկության գործով կառավարիչ Արմեն Խաչատրյանի կողմից, պարտապանի նկատմամբ դատարան ներկայացված պահանջների հիման վրա, կազմվել է պահանջների նախնական ցուցակը՝ պահանջների բավարարման հերթականությանը համապատասխան, և այն ներկայացվել է դատարան: Միաժամանակ նախնական ցուցակը 30.03.2023 թվականին հրապարակվել է <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում և ուղարկվել ծանուցումներ փոստային եղանակով: Պարտապանին հասցեագրված կառավարչի կողմից կազմած պահանջների նախնական ցուցակը 01.04.2023 թվականին փոստային եղանակով ուղարկվել է պարտապան «ԼԵՈ 666» ՍՊԸ-ի գտնվելու վայրի հասցե:

Վկայակոչված իրավանորմերի ու փաստական հանգամանքների համատեքստում, հիմք ընդունելով այն հանգամանքը, որ պարտապանի և պարտատերերի ծանուցմանն ուղղված գործողությունները կատարվել են կառավարչի կողմից, իսկ առարկությունների ներկայացման օրենքով նախատեսված յոթնօրյա ժամկետը լրացել է, սակայն դատարանն առարկություն չի ստացել, դատարանը գտնում է, որ սույն սնանկության գործով պահանջների վերջնական ցուցակը ենթակա է հաստատման:

«Սնանկության մասին» ՀՀ օրենքի 19-րդ հոդվածի առաջին մասի «բ» կետի համաձայն՝ «պահանջների վերջնական ցուցակը հաստատելու մասին որոշմամբ նշանակում է պարտատերերի առաջին ժողովի անցկացման ժամանակը և վայրը: Պարտատերերի առաջին ժողովը նշանակվում է պահանջների վերջնական ցուցակը հաստատելու մասին որոշումը կայացնելու օրվանից ոչ ուշ, քան 40 օրվա, և ոչ շուտ, քան 30 օրվա ընթացքում:

Պահանջների վերջնական ցուցակը հաստատելու մասին դատարանի որոշման բողոքարկումը չի կարող խոչընդոտ հանդիսանալ պարտատերերի առաջին ժողովի

անցկացման համար, բացառությամբ եթե բողոքարկվում են որոշմամբ հաստատված բոլոր պահանջները. »:

Անդրադառնալով նշված հարցին և նկատի ունենալով, որ նույն կետի համաձայն պարտատերերի առաջին ժողովը նշանակվում է պահանջների վերջնական ցուցակը հաստատելու մասին որոշումը կայացնելու օրվանից ոչ ուշ, քան 40 օրվա, և ոչ շուտ, քան 30 օրվա ընթացքում, ուստի դատարանը գտնում է, որ «ԼԵՈ 666» ՍՊԸ-ի սնանկության վերաբերյալ գործով **պարտատերերի առաջին ժողովի անցկացման ժամանակը պետք է նշանակել 2023 թվականի մայիսի 22-ին, ժամը 10:00-ին, ՀՀ սնանկության դատարանի շենքում՝ ք. Երևան, Օտյան 53/2 հասցեում:**

«Սնանկության մասին» ՀՀ օրենքի 19-րդ հոդվածի առաջին մասի «դ» կետի համաձայն՝ «1. Պարտապանին սնանկ ճանաչելու մասին վճիռն օրինական ուժի մեջ մտնելուց հետո դատարանը՝ կառավարչին պարտավորեցնում է ոչ ուշ, քան համապատասխան դատական ակտերի ուժի մեջ մտնելու պահից՝ 5 օրվա ընթացքում, պարտապանին սնանկ ճանաչելու, կառավարիչ և պարտատերերի առաջին ժողովը նշանակելու մասին տեղեկությունները հրապարակել <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում և փակցնել դատարանի շենքում հատուկ հատկացված տեղում»:


Հաշվի առնելով այն հանգամանքը, որ «Սնանկության մասին» ՀՀ օրենքի 19-րդ հոդվածի առաջին մասի «բ» կետի ուժով պահանջների վերջնական ցուցակը հաստատելու մասին որոշմամբ սահմանվել է պարտատերերի առաջին ժողովի անցկացման ժամանակը և վայրը, դատարանը գտնում է, որ սույն սնանկության գործով կառավարիչ՝ Արմեն Խաչատրյանին պետք է պարտավորեցնել ոչ ուշ, քան համապատասխան դատական ակտերի ուժի մեջ մտնելու պահից՝ 5 օրվա ընթացքում, պարտատերերի առաջին ժողով՝ նշանակելու մասին տեղեկությունները հրապարակել <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում և փակցնել դատարանի շենքում հատուկ հատկացված տեղում:

Ելնելով վերոգրյալից, հիմք ընդունելով «Սնանկության մասին» ՀՀ օրենքի 46-րդ, 82-րդ հոդվածները և ղեկավարվելով դիմումը վարույթ ընդունելու պահին գործող ՀՀ քաղաքացիական դատավարության օրենսգրքի 199-րդ, 200-րդ հոդվածներով՝

Ո Ր Ո Շ Ե Ց Ի

Հաստատել «ԼԵՈ 666» ՍՊԸ-ի նկատմամբ դատարան ներկայացված պահանջների վերջնական ցուցակն՝ ըստ ցուցակում նշված առաջնահերթության և ապահովվածության.

Հ/Հ	Պարտատիրոջ անվանումը	Պահանջի չափը	Պահանջի խումբն՝ ըստ առաջնահերթության
1	ՀՀ ՊԵԿ	1 000 000 ՀՀ դրամ	«Սնանկության մասին» 82-րդ հոդվածի 1-ին մասի «դ» հերթ
2	ՀՀ ՊԵԿ	4 359 853 ՀՀ դրամ	«Սնանկության մասին» 82-րդ հոդվածի 1-ին մասի «ե» հերթ



Պարտատերերի առաջին ժողովի անցկացման ժամանակը սահմանել 2023 թվականի մայիսի 22-ին, ժամը 10:00-ին ՀՀ սնանկության դատարանի շենքում՝ ք. Երևան, Օտյան 53/2 հասցեում:

Կառավարիչ՝ Արմեն Խաչատրյանին պարտավորեցնել ոչ ուշ, քան համապատասխան դատական ակտերի ուժի մեջ մտնելու պահից՝ 5 օրվա ընթացքում, պարտատերերի առաջին ժողով նշանակելու մասին տեղեկությունները հրապարակել <http://www.azdarar.am> հասցեում գտնվող Հայաստանի Հանրապետության հրապարակային ծանուցումների պաշտոնական ինտերնետային կայքում և փակցնել դատարանի շենքում հատուկ հատկացված տեղում:

Որոշումը կարող է բողոքարկվել Հայաստանի Հանրապետության վերաքննիչ քաղաքացիական դատարան, կայացվելուց հետո՝ 15-օրյա ժամկետում:

ԴԱՏԱՎՈՐ



Լ. ԿԱՏՎԱԼՅԱՆ